

Napparsimasut Maalaarutaannik Aalajangiisartunut maalaaruteqartarneq pillugu Namminersorlutik Oqartussat nalunaarutaat nr. 14, 24. september 2012-imeersoq

Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut Inatsisaat nr. 27, novembarip 18-ani 2010-meersoq § 11a Inatsisartut Inatsisaanni nr. 2-mi maajip 29-ni 2012-imeersumi allannguuteqartinneqartoq naapertorlugu, aalajangersarneqarpoq:

Atuuffissaa

§ 1. Kalaallit Nunaanni ilinniarsimassuseq tunuliaqutaralugu peqqinnissakkut sullissisut pillugit napparsimasut maalaarutaat Qallunaat Nunaanni Napparsimasut Maalaarutaannik Aalajangiisartunut saqqummiunneqassapput.

Stk. 2. Nunatsinni Nakorsaanerup Kalaallit Nunaanni ilinniagaqassuseq tunuliaqutaralugu peqqinnissakkut sullissisut sulinerat pillugu isornartorsiuinissaq, allatulluunniit kinguneqartitsinissaq tunngavissaqarsorinarpat, suliat Napparsimasut Maalaarutaannik Aalajangiisartunut saqqummiussinnaavaa.

§ 2. Kalaallit Nunaanni peqqinnissakkut sullissisut Napparsimasut Maalaarutaannik Aalajangiisartut suliassaqarfiinut ilaasut tassaapput:

1) Peqqinnissakkut sullissisut ilinniagaqassuseq tunuliaqutaralugu qallunaat sulisinnaatitaanermut akuersissutaannik pigisallit taakkununga ilaallutik nakorsat, kigutit nakorsaat, kiropaktorit, ernisussiorlut, pillorissaasut, timimik sungiusaasut, aaviaasartut. nappaatillit nerisaqarnerannut siunnersortit, qinguartaasartut, timikkut innarluutilinnut iluaqusersuusiortut, kigutaasiortut, kigutigissaasut, isarualerisut, isarussanut taarsiullugit atortakkanik igalaasartaasalerisut isarualerisutullu ilinniartitaaneq nutaaq naapertorlugu ilinniarsimasut, isigalerisut kiisalu isumaginninnermi peqqissaanermilu assistentit.

2) Tarnip pissusaanik immikkut ilisimasallit peqqinnissaqarfimmi suliffeqartut, tarnikkut nappaatilinnik sullissisut (plejer), napparsimasunik paaqqinnittut, illuni paaqqinniffinni assistentit, nakorsaaterisut, nakorsaasiornermik immikkut ilisimasallit nakorsaataasivimmi suliffillit, nakorsaataasivimmi siunnersortit nakorsaasiornermillu immikkut ilisimasalittut ilinniartut ilinniarnerninnut atatillugu nakorsaataasivimmiissimasut.

3) Kigutit nakorsaasa namminersortut peqqinnissakkut sullissinerat.

4) Peqqissaasut, kigutigissaasut, klinikassistentit, peqqinnissamik siammarsaasut, sundhedsassistentit, inunnik isumaginninnermi peqqissaanermilu ikiortit, nunaqarfinni peqqinnissakkut sullissisut, peqqissaanermi ikiortit, portøritullu annaassiniartartut Kalaallit Nunaanni ilinniarsimaneq

sulisinnaatitaanerluunniit tunngavigalugu peqqinnissakkut sullissisut.

§ 3. Peqqinnissakkut sullissineq maalaarutaasoq Kalaallit Nunaanni peqqinnissaqarfimmit nakorsartinnissamik pisariaqartitsisunik misissuinerunngippat nakorsartinnissamullu innersuussinerunngippat, Pituffiup sakkutooqarfiani peqqinnissakkut sullissisunut, Nalunaarut atuutinngilaq.

Maalaarutininik piareersaasarneq

§ 4. Napparsimasut Maalaarutaannik Aalajangiisartunut maalaarut, Nunatsinni Nakorsaaneermut tunniunneqassaaq. Nunatsinni Nakorsaaneerup maalaarut suliassanngortissavaa Napparsimasullu Maalaarutaannik Aalajangiisartunut ingerlateqqillugu.

Imm. 2. Tamatuma kingorna peqqinnissakkut sullissisumit, maalaaruteqartumit maalaarutigineqartumillu, allattugaatinik oqaaseqaatinillu Nunatsinni Nakorsaaneq pissarsiniassaaq. Nunatsinni Nakorsaaneq Kalaallit Nunaanni pissutsinik atugassarititaasunillu, maalaarummut pineqartumut naliliinissami pingaarutilittut isigisariaqakkanik nassuiaatitalimmik, suliamut tunngatillugu saqqummiussissaaq.

Imm. 3. Nunatsinni Nakorsaaneerup suliamut tunngatillugu saqqummiussaa, naliliinera maalaarutillu aalajangiiviginissaanut innersuussutaa, Napparsimasut Maalaarutaannik Aalajangiisartut suliamik nangitsinerminni atugassaattut nassiunneqassaaq.

§ 5. Napparsimasut Maalaarutaannik Aalajangiisartut maalaarummut aalajangiinninneranni, Peqqissutsimut Naalakkersuisoqarfik, Nunatsinni Nakorsaaneq, maalaaruteqartoq peqqinnissakkullu sullissisut maalaarutigineqartut, aalajangiinissamut siunnersuut immikkullu ilisimasallit naliliinerat aalajangiinermut tunngavisoq ilanngullugu, tusarniaavigineqassapput.

§ 6. Nunatsinni Nakorsaaneq maalaarutit qallunaatut kalaallisullu nutserneqarnissaanut Napparsimasut Maalaarutaannik Aalajangiisartunut ikiutissaaq aningaasartuutitaalu akilissallugit.

Maalaarutininik tamanut saqqummiussineq

§ 7. Napparsimasut Maalaarutaannik Aalajangiisartut aalajangigaat Nunatsinni Nakorsaaneerup ukiumoortumik nalunaarusiaani naalisarlugit issuaavigineqartarput. Peqqinnissakkut sullissisoq maalaaruteqartoq pillugu paasissutissat ilisarnarunnaarsarneqartarput.

Maalaaruteqarsinnaaneermut piffissatut killiliussat

§ 8. § 1 imm. 1 naapertorlugu maalaarut, pisimasup maalaarutiginiakkap ilisimalerneraniit imaluunniit ilisimalersimasariaqarfianiit ukiut marluk qaangiutsinnagit Napparsimasut Maalaarutaannik Aalajangiisartunut imal. Nunatsinni Nakorsaaneermut tunniunneqassaaq. Pisimasulli

maalaarutiginiakkap kingorna kingusinnerpaamik ukiut tallimat qaangiunneranni maalaarut tunniunneqassaaq.

Atuutilerfia

§ 9. Nalunaarut oktobarip aallaqqaataani atuutilissaaq

Imm. 2. Peqqinnissakkut sullinneqarneq pillugu maalaarutit Napparsimasut Maalaarutaannik Aalajangiisartunit naammassineqassapput.

Namminersorlutik Oqartussat ulloq: 24. september 2012

Agathe Fontain

/

Ann Birkekær Kjeldsen